

Uunga siunnersuut: Sukisaarsaatigalugu aalisartunik aalisartitsinermut akuersissuteqartarneq pilluga Inatsisartut inatsisaat

Akissuteqaat

(Aalisarnermut, Piniarnermut Nunalerinermullu Naalakkersuisoq)

Pingajussaaneerinnineq

Piffissaq akuersissutip atuuffissaa § 20-mi allaqqasoq ukiunit quliniit ukiunut tallimanut allanngortinneqarnissaa pillugu ikinnerussuteqartut isumaliutissiisummi siunnersuuteqarput.

Isumaga malillugu piffissap akuersissutip attuffissaata ukiunut qulinut aalajangerneqarnissaanut pissutsit arlallit ersersitsipput.

Pissuseq pingaaruteqartoq tassaavoq angallammut takornarissanik kuummut akuersissuteqarfiusumut angallassissutissamut annertuunik aningaasaliisoqartussaana. Angallat inunnik angallassissutaasinnaasutut akuerineqartoq aqqaneq marlunnillu ilaasoqarsinnaasoq pisariaqartinneqassaaq. Angallammut taamaattumut annertuunik aningaasaliisoqartussaavoq, tassani kuummi akuersissuteqarfiusumi ukiuni qulini ingerlatsinissaaq naleqqutissalluni.

Taassuma saniatigut kuup akuersissuteqarfiusup eqqaani illuaqqanik ineqarfiusinnaasunik sanasoqarnissaaq sumiiffinni arlaqartuni isumagineqartassaaq.

Pissuseq alla ukiunut qulinut aalajangiinissamut tapersiisoq tassaavoq, sullittagaqalernissamut kuullu akuersissuteqarfiusup sukisaarsaatigalugu aalisarlutik takornarissat nunanit allaneersut akornanni ilisimaneqalernissaanut piffissaq siviisoq atorineqartussaammat.

Akuersissummik pigisaqalersimasooq, kuummi akuersissuteqarfiusumi sukisaarsaatigalugu aalisartitsinermik aallartitsisussaaq sukisaarsaatigalugu aalisartunik kuummukartitsisinnaasunik nunanik attaveqarfinnik nassaarniartussaassaaq. Tamanna piffissaq siviisoq atorlugu ingerlassaaq, naatsorsuutgineqarporlu ukiut 10 naleqquttuussasoq, nunani allani kuummut akuersissuteqarfiusumut ussassaarinissamut aammalu pisisartussanut nassaarniarnermut ineriartortitsinissamut.

Ikinnerussuteqartut siunnersuutaasa aappaat tassaavoq akitsuut inummut ataatsimut ullormut ataatsimut 150 kr.-iniit, inummut ataatsimut ullormut ataatsimut 450 kr.-inut allanngortinneqassasoq.

Ullormut ataatsimut inummut ataatsimut akitsuutissaaq 150 kr.-itut annertutigisoq siunnersuutigineqartoq sukisaarsaatigalugu aalisartunik takornariartitsinermik niuerfinni akinut maannakkut atuuttunut sanilliullugu isigineqassaaq, uanilu nalilerneqarpoq ullormut ataatsimut 150 kr.-it aalajangerneqartut niuerfinni nappanneqarsinnaasut.

Akileraarutissat qaffasippallaartinneqarpata akuersissummik qinnuteqarnissamik kissaateqartoqarsinnaanissaaq navianartorsiortinneqarsinnaavoq, tassa inaarutaasumik akeq

takornarissamat qaffasippallaassammat, taamaalillunilu Kalaallit Nunaanni kuunnut akuersissuteqarfiusunut angalinissamat takornarissat pisinissaminnut tunuarsimaalersinnaallutik.

Akitsuut ullormut 450 kr.-inut aalajangerneqarpat, ulluni tallimani sukisaarsaatigalugu aalisariarnermut akitsuut tamatigut 2.250 kr.-iussaaq.

Tamanna Kalaallit Nunaanni sumiiffinni takornariartitsisartut maannakkut akigititaannut sanilliullugu isigineqassaaq.

Kalaallit Nunaanni illoqarfimmut kuummut angalanermi aallaaviusussamat timmisartumut ilaaneq ilanngunnagu ulluni tallimani angalanermut 15.000 kr.-it Kalaallit Nunaanni sukisaarsaatigalugu aalisartitsisartunit nalinginnaasumik akigitinneqartarpoq.

Sukisaarsaatigalugu aalisariarluni takornariaq taamaalilluni ullormut 450 kr.-inik akitsuutitut akiliuteqassaguni angalanermut tamarmut imatut akiliissaaq:

Timmisartumut ilaaneq	7.000
Sukisaarsaatigalugu aalisariarneq	15.000
Akitsuut	2.250

Katillugit	24.250

Apeqqutaavoq kuummut akuersissuteqarfiusumut ulluni tallimani eqalunniarnermut katillugit 24.250 kr.-inik akeqartumut qanoq amerlatigut sukisaarsaatigalugu aalisariarlutik angalarusussanersut. Akeq taamatut annertutigisoq sukisaarsaatigalugu aalisariarfiusartunut pitsaasunut allanut assersuutigalugu Islandimut, Norgemut Alaskamulluunniit angalanernik angalatitsisartut angalatitsineranni angalanermut akinut sanilliullugu nalilersorneqassaaq. Taamaammatt akeq tamarmiusoq qaffasippallaarpat takornarissat Kalaallit Nunaannukangeriataarsinnaapput.

Taamaalilluni kuunnik allanik akuersissuteqarfiumngitsunut akiliiffiusussaannngitsunullu angalatitsinissamik angalatitsisartut toqqaasinnaapput.

Piffissaq sivisunerusoq eqqarsaatigalugu, aaqqissuussineq aallartilluareerpat, akitsuutip annertussusaa nalilersoqqinneqarsinnaavoq immaqalu qaffanneqarsinnaassalluni.

Nunap karsiata isertitsinissaa aaqqissuussinermi pingaarnertut anguniagaannngilaq, anguniagaallunili Kalaallit Nunaanni takornariartitsisarnermi ingerlanneqartumut ataatsimut pitsaasunik sinaakkusiinissaaq, taamaalilluni tamanna ineriartortinneqarsinnaaniassammat. Inuussutissarsiutit immikkoortuat ataaseq ineriartoraangat inuiaqatigiinnit tamatigut pissarsissutaasarpog, soorunalumi sinneqartoortunit akileraarutitik nalinginnaasumik akiliisoqartassaaq.

Taamatut oqaaseqarlunga siunnersuut Inatsisartunut pingajussaaniigassannngortippara.